

GIPUZKOAKO PARKETXE SAREA FUNDAZIOAREN ESTATUTUAK

I. TITULUA XEDAPEN OROKORRAK

1. artikulua.- Eraketa, izena eta iraupena

GIPUZKOAKO PARKETXE SAREA Fundazioa izenpean fundazio bat eratzen da 2016ko ekairan 2ko 9/2016 Legearen eta indarrean dauden gainerako arauzko xedapenen arabera.

GIPUZKOAKO PARKETXE SAREA Fundazioa irabazi asmorik gabe eratutako erakunde bat da eta, fundatzaileen borondatez, bere ondarea modu iraunkorrean interes orokorreko helburuetara xedatzen du, estatutu hauen 3. artikuluan azaltzen den moduan.

2. artikulua.- Araubide juridikoa, izaera eta gaitasun juridikoa

Fundazioak izaera juridiko propioa eta independentea du eraketa eskritura Euskal Autonomia Erkidegoko Fundazioen Erregistroan inskribatu zenetik aurrera eta erabateko gaitasun juridikoa eta jarduteko gaitasuna izango ditu, mugapen bakarrak izango direlarik eraketa ekitaldian fundatzaileek borondateen adierazpenean ezarritakoak eta estatutu hauetan eta aplikagarri diren lege xedapenetan, bereziki 2016ko ekainaren 2ko 9/2016 Legea (Euskal Herriko Fundazioena) ezarritakoak.

Horrenbestez, eta Babesletzari egin beharreko jakinarazpenak eragotzi gabe, aukera izango du era guztietako ondasun higigarri edo higiezinak eta eskubideak erosteko, gordetzeko, edukitzeko, erabiltzeko, edozein bide erabilita besterentzeko eta grabatzeko; egintza edo kontratu mota oro egiteko; maileguak jaso eta itzultzeko; eta administrazio bidea edo auzibidea onartzeko edo haietara jotzeko, Auzitegi, Epaitegi eta erakunde publiko eta pribatuen aurrean ekintza eta salbuespen mota oro gauzatzuz, ordenamendu juridikoan xedatutakoa betez.

3. artikulua.- Fundazioaren xedeak

Fundazioaren helburua da Gipuzkoako parke naturalen kudeaketa integratua egitea. Helburu zabal horren artean, jarduera garrantzitsu eta berehalakoena honako hauek izango dira:

- 1) Fundazioak Gipuzkoako Parketxeen Sarea sortu, sustatu eta zabalduko du irizpide homogeneotan oinarrituta kudeatzeko.

- 2) Gipuzkoako Parketxeen Sarearen kudeaketa integratuaz eta dinamizazioaz arduratuko da.
- 3) Parketxeen Sarearen bitartez, Fundazioak ingurumen heziketa, natura ingurunearen ezagutza eta ingurumenarekiko errespetuzko balioak sustatuko ditu herritarren artean, oro har, nahiz gipuzkoarren artean bereziki.
- 4) Halaber, Parketxeen Sarearen bitartez, Fundazioak naturarekin lotutako aisialdi, boluntario eta turismo jarduerak, natura ingurunearekin bat eginda gauzatzen diren jolas-jarduerak sustatu eta bultzatuko ditu.
- 5) Betiere, Fundazioak Gipuzkoako parke naturalen egoera eta beharrak ezagutzeko eta irakaspen baliagarriak lortzeko balioko duten azterketa edo ikerketa proiektuak egingo ditu.
- 6) Era berean, aurreko paragrafoetan adierazitako baloreak sustatzeko, Fundazioak sektore publikoaren eta pribatuaren arteko lankidetzak bultzatuko ditu. Bereziki, ekimen zehatzetan parte hartu ahal izango du, ekimen horiek arrakastatsuak izaten lagun dezaketen eragile publiko nahiz pribatuen parte hartzea bultzatuz.
- 7) Oro har, Fundazioak Gipuzkoako Parke Naturalen Sarea, zuzenean edo zeharka, sustatzen eta hobetzen lagun dezakeen ekimen mota oro gauzatu ahal izango du.

Fundazioaren jarduerak ez ditu eragotziko bertan parte hartzen duten administrazio publikoen eskumena, ezta fundazioan sartzen diren gainerako pertsona fisiko eta juridikoen xede eta helburu propioak ere.

4. artikulua.- Xedeak gauzatzea

Fundazioak egoki irizten duen moduan gauzatu ahal izango ditu bere xedeak, beste entitate eta erakunde batzuetan parte hartzea barne; eta mugapen bakarrak izango dira eraketa eskrituratik, estatutu hauetatik eta, betiere, legeetatik eratorritakoak.

5. artikulua.- Fundazioaren helbidea

Fundazioaren helbidea Donostiako Gipuzkoa plaza z.g. izango da (Foru Jauregia). Patronatuak askatasun osoz erabaki dezake Fundazioaren helbidea aldatzea eta, hala eginez gero, Euskal Autonomia Erkidegoko Fundazioen Erregistroari jakinarazi beharko dio. Halaber, Patronatuak eskumena izango du fundazioaren xedean betetzeko sortzen diren beharren arabera ezar daitezkeen establezimendu, ordezkaritza edo bulegoen helbideak finkatzeko.

6. artikulua.- Lurralde eremua

Fundazioak, nagusiki, Euskal Autonomia Erkidegoan gauzatuko ditu bere jarduerak, alabaina, bere helburuak hobeto bete ahal izateko, aukera izango du mundu osoan harremanak ezartzeko edo jarduteko.

7. artikulua.- Onuradunak

Fundazioaren jardueren onuradun izango dira pertsona talde zehaztugabeak; bereziki, entitate soziologiko, kultural eta politiko gisa Euskal Herria bezala ezagutzen den horretan biltzen direnak.

Fundazioak bere prestazioak sekula ezin izango die eman fundazioaren sortzaileei edo patronatuko kideei edo horien guztien ezkontideei edo haiekin antzeko harreman afektiboa dutenei edo haien laugarren gradura bitarteko ahaideei – laugarrena barne –; ez eta prestazio horiek interes orokorreko helburuak ez dituzten pertsona juridiko bereizientzat badira.

Fundazioak ematen dituen zerbitzuengatik diru kopuruaren bat eskatzen badie bere onuradunei, dagokion kopuruaren ordainketaren arabera bakarrik zehaztuko ditu onuradunak. Halaber, Fundazioaren izaera dela-eta onuradunen kopurua mugatu behar bada, Fundazioaren Patronatuak hautatuko ditu onuradunak eta erabaki ezeztazina izango da; horretarako kontuan hartuko ditu hautagaien merezimenduak, beharrak, gaitasun ekonomikoa eta aprobetxamendu aukerak edo bestelako ezaugarri objektiboak. Nolanahi ere, onura horiek eman aurretik inork ezingo du, ez bakarka ezta taldean ere, onura horien gozamina alegatu Fundazioaren edo bere Patronatuaren aurrean, ezta pertsona jakin batzuenak direnik ere esan.

8.- artikulua.- Jarduera eta funtzionamendu printzipioak

Fundazioak printzipio hauek izango ditu gidari bere jardueran:

a) Publikotasuna eta gardentasuna. Fundazioaren helburu eta jarduerari buruzko informazio nahikoa emango du, herritarrek, oro har, eta balizko onuradunek haien berri izan dezaten.

b) Inpartzialtasuna eta diskriminaziorik eza onuradunak zehazterakoan, baita jarduerak eta prestazioak zehazterakoan ere.

c) Jarduteko jarraibideen sustapena, jokabide-kodeak eta funtzionamendurako jardunbide gokiak sortuz.

d) Patronatuko kideen zerbitzu-izpirituaren sustapena, baita interes propio eta partikularren aurrean fundazioaren interesak lehenestearena ere.

e) Lankidetzaz leiala eta etengabekoa Euskal Autonomia Erkidegoko Fundazioen Babesleztarekin.

f) Fundazioaren ondarea eta errentak benetan fundazioaren helburuetarako erabil daitezkeen defendatu eta babestea, fundazioaren estatutueta eta indarrean dagoen araudian aurreikusitakoarekin bat etorrita.

g) Genero-berdintasuna.

Fundazioaren antolaketa, funtzionamendua eta erabakiak hartzeko araubidea estatutueta ezarritakoarekin bat etorriko da, eta, hala badagokio, patronatuak onetsitako barne-araubideko arauekin.

II. TITULUA PATRONATUA

1. kapitulua. Osaketa eta eskumenak.

9. artikulua.- Patronatua

Patronatua Fundazioaren gobernu, administrazio eta ordezkaritza organo gorena da eta bere esku izango ditu fundazioaren xedeak betetzeko beharrezkoak diren kudeaketaren zuzendaritzako eta kontrolako eskumenak. Hain zuzen ere, Fundazioaren ondarea osatzen duten ondasunak eta eskubideak administratuko ditu.

10. artikulua.- Osaketa eta karguaren iraupena

Patronatua gutxienez hiru (3) kidez eta gehienez ere hamabi (12) kidez osatuta egongo da.

Patrono kargua mugagabea izango da.

11. artikulua.- Patronoen izendapena eta kargu-uztea eta bakanteak betetzea

Lehenengo patronoa fundatzaileek izendatuko dute eraketa eskrituran. Patronatuko hurrengoko kideak, jarraian zehazten denaren arabera izendatuko dira.

a) Hamar (10) kide ondoren zehazten diren lurraldeko herri administrazioek izendatuko dituzte:

- Bost (5) Parke Naturalen gaineko eskumena duen Gipuzkoako Foru Aldundiko departamenduak izendatuko ditu. Huetako bostetatik, ezinbestekoa da, bat, aipatutako Departamenduko Foru Diputatua izatea eta bestea, parke naturalen gaineko eskumena duen saileko zuzendari nagusia izatea.

- Beste bat (1) Oiartzungo Udalak izendatuko du.
- Beste bat (1) Ataungo Udalak izendatuko du.
- Beste bat (1) Aiako Udalak izendatuko du.
- Beste bat (1) Oñatiko Udalak izendatuko du.
- Beste bat (1) Zegamako Udalak izendatuko du

b) Eta falta diren beste bi (2) patronoak Patronatuaren akordioz izendatuko dira, Patronatuko lehendakariaren ekimenez eta berak proposatuta. Patronatuak erabakitzen dituen izendapenak fundazioaren xedeetara ekarpen pertsonal edo ekonomiko nabarmena eta adierazgarria egin dutenen aldekoak izango dira. Ondorio horietarako, ekarpen nabarmen eta adierazgarritzat joko dira estatutu huen 44. Artikuluan aurreikuste den “entitate babesle” izaera duten egindakoak.

Patrono izendatutakoek berariaz onartu edo uko egin beharko dute kargu hori, Legaren 16. artikuluan aurreikusitako formuletakoren bat erabiliz. Onarpena Euskal Autonomia Erkidegoko Fundazioen Erregistroan jasota geratuko da.

Izendatutako kargu publiko edo pribatu baten titular bada, bere ordezkari beteko duen beste pertsona baten esku utzi ahal izango du. Eskuordetze hori iraunkorra bada, Euskal Autonomia Erkidegoko Fundazioen Erregistroan jaso beharko da.

Patronatuko kideak izendatu zituen entitate beraren erabakiz kendu ahal izango dira kargutik, baita Legearen 20. artikuluan zehaztutako arrazoietakoren batengatik ere. Bereziki, eraketa eskrituran izendatutako Patronatuko kideak Fundazioaren Patronatuak kargugabetu ahal izango ditu.

Ondoren zehaztuko diren arrazoietakoren batengatik gertatzen diren bakanteak edo gobernu organoko kideren bat ordezkari edo kargugabetzea eragiten duen arrazoiaren batengatik gertatutakoak prozedura bera erabiliz beteko dira, eta bakante egoera ezingo da 6 hilabete baino gehiago luzatu. Bakanteak eragin ditzaketen arrazoiak dira: heriotza, ezgaitasuna, gaitasun gabetzea, heriotza adierazpena, bazterketa edo bateraezintasuna, agintaldia iraungitzea, uko egitea edo kargutik kentzea.

Patronatuak hartzen dituen erabakiak baliozkoak izan daitezen, patronatuko kideek estatutu hauetako 10. Artikuluan zehazten den gutxieneko kide kopuruekin mantendu beharko dute aipatutako organoa.

Gobernu organoko kideen ordezkariena, kargu uztea eta kargu gabetzea Fundazioen Erregistroan jasoko da.

12. artikulua.- Karguaren doakotasuna

Patronatuko kideek doan beteko dute beren kargua. Hala eta guztiz ere, dagokien zereginetan sortu zaizkien eta behar bezala justifikatzen dituzten gastuak berreskuratzeko aukera izango dute.

Fundazioaren sortzaileek kontrakorik zehaztu ez bazuten, Patronatuak erabaki dezake ordainsari bat ematea beren eginkizunei dagozkien zerbitzuez gain Fundazioan beste zerbitzu batzuk ematen dituzten kideei. Erabaki hori Babesletzak baimendu beharko du hiru hilabeteko epean dute.

13. artikulua.- Fundazioaren lehendakaria

Fundazioaren lehendakaria parke naturalen gaineko eskumena duen Gipuzkoako Foru Aldundiko departamentuko foru diputatua izango da. Lehendakariak gobernu organo horren gorenko ordezkari izango du eta, fundazioko kide orori dagozkion eta estatutu hauetan berari esleitutako eskumenez gain, ondoren aipatzen diren eta mugatzaileak ez diren beste atribuzio hauek ere izango ditu:

- 1) Fundazioaren ekitaldi publiko eta pribatu guztien buru izatea.
- 2) Bere ekimenez edo kideen seiren batek gutxienez eskatuta Patronatuaren bilera deitzea; eztabaidak zuzentzea eta hartzen diren erabakiak betearaztea.
- 3) Fundazioaren ordezkari izatea era guztietako harreman, ekitaldi eta kontratuetan estatuaren, autonomia erkidegoaren lurralde administrazioaren, probintziaren, udalaren, agintarien, administrazio zentro eta bulegoen aurrean; auzitegien, epaitegien, korporazioen, organismoen, elkarten eta bankuen aurrean (Espainiako bankua eta banka ofiziala barne); mota guztietako pertsona juridiko eta partikularren, nazionalen eta atzerritarren aurrean, dagozkion eskubide, egintza eta salbuespen guztiak gauzatzuz eta Fundazioari dagozkion edo interesatzen zaizkion prozedura, espediente, erreklamazio eta epaketetako izapide, instantzia, gorabehera eta errekurso guztiak betez. Horretarako lehendakariari, notario aurrean, ahalmenik handienak emango zaizkio.
- 4) Fundazioaren Patronatuak berariaz bere esku jar ditzakeen bestelako eskumenak eta atribuzioak.

14. artikulua.- Lehendakariordea

Lehendakariorde izango da parke naturalen gaineko eskumena duen Gipuzkoako Foru Aldundiko saileko zuzendari nagusia. Oro har, lehendakariordearen atribuzioak eta eskumenak Patronatuaren erabakiz onartuko dira kasu bakoitzerako. Aurrekoa eragotzi gabe, lehendakaria ez dagoenean edo gaixorik dagoenean lehendakariordeak ordeztuko du, eta hori frogatzeko nahikoa izango da bien adierazpena.

15. artikulua.- Idazkaria

Patronatuak bertako kideen artetik edo horietatik kanpo idazkari bat izendatu beharko du eta bere kargura izango du Fundazioaren lan administratiboen zuzendaritza, dokumentazioa zainduko du eta Akten Liburuan jasotzen diren bileren akta egingo du onartu ondoren eta lehendakariaren oniritzia jaso eta gero.

16. artikulua.- Diruzaina

Gipuzkoako Foru Aldundiak izendatutako kideen artetik Patronatuak diruzain bat izendatu ahal izango du eta Patronatuak berariaz aginduko dizkion zereginak izango ditu.

Honako hauek dira diruzainaren esku utzi daitezkeen zereginak:

- 1) Fundazioaren funtsak biltzea eta zaintzea.
- 2) Urteko kontua aurkeztea eta sinatzea
- 3) Inbentarioen, kontuen eta aurrekontuen liburuak eta Liburu Egunkaria eramatea.

17. artikulua.- Gerentea

Patronatuak gerente bat izendatu ahal izango du eta bere egitekoak izango dira Patronatuak hartutako akordioak betearaztea eta horien jarraipena egitea. Izendapenean besterik zehazten ez bada, Patronatuaren erabakiz gerenteak ondorengo oinarritzko zereginak beteko ditu:

- a) Patronatuak hartutako akordioak eta emandako jarraibideak betearaztea.
- b) Fundazioaren zerbitzuak zuzentzea, ezarritako xedeak lortzeko beharrezkoak izan daitezkeen antolamendu zereginak bere gain hartuta.
- c) Fundazioaren helburuen arabera proiektuak, azterlanak eta zerbitzuak kontratatzea.

- d) Fundazioak ekitaldi ekonomiko bakoitzean egin ditzakeen jarduera programak prestatzea, proposatzea eta, bidezko iritziz gero, zuzentzea, Patronatuak onartu ondoren.
- e) Fundazioaren instalazio, zerbitzu edo jarduera berriei buruzko proiektuak, eta lehendik daudenak zabaldu edo berritzekoak aurkeztea, Patronatuak onartu ditzan.
- f) Beharrezko irizten diren lankidetzak, laguntza eta erosketak kontratuak idaztea eta Patronatuari proposatzea.
- g) Zerbitzu jarduera guztien kontabilitate orokorra eta laguntzailea, eta ordainketen eta kobrantzen kudeaketa antolatzea.
- h) Fundazioarentzat lanean ari diren pertsonen ordainsariak, egin behar zaizkien kontratuak, bereizketa, lan jardueren antolaketa eta lan erregimena Patronatuari proposatzea.
- i) Ordainketak agintzea eta Fundazioaren banku-kontuak erabiltzea, Patronatuak berriaz finkatuko dituen mugapenekin.
- j) Patronatuak onartu ditzan, Fundazioaren urteko aurrekontuak eta horien likidazioa prestatzea eta aurkeztea, Fundazioen Erregistroan aurkezteko.

Gerentearen izendapena mugagabea izango da, nolana ere, Patronatuak edozein momentutan kargutik kentzea erabaki dezake ebazpen arrazoitua emanez.

Gerenteak bere zereginak eraginkortasunez bete ahal izan ditzan, beharrezkoa duen notario-ahalordea jasoko du.

18. artikulua.- Fundazioarentzat lan egiten duten beste pertsona batzuk

Halaber, Patronatuak gobernu organoko kideren bati edo hirugarren batzuei agindu ahal izango die beste jarduera batzuk kudeatzea edo egitea Fundazioaren izenean, egiteko horiei dagokien ordainsaria emanez.

Bereziki, Patronatuak letratu aholkulari bat izendatu ahal izango du eta bere egitekoak izango dira Fundazioari aholkularitza juridiko orokorra ematea, Patronatuak hartuko dituen akordioen kontrol juridikoa egitea eta idazkariari Patronatuaren Akta Liburua zaintzen eta eramaten laguntzea; horretarako Patronatuaren bileretara joan ahal izango da hark gonbidatuta.

19. artikulua.- Patronatuaren eskumenak

Patronatuaren eskumenak Fundazioaren gobernuari dagokion guztira hartzen du eta, bereziki, ondorengo alderdi hauek:

- 1) Fundazioaren orientazioa markatzea bere helburuak hobeto betetzeko.
- 2) Edozein jatorriko baliabide ekonomiko eta finantzario guztiak administratzea.
- 3) Inbentarioa, egoeraren balantzea, emaitzen kontua, aurreko urteko memoria eta urteko kontuen likidazioa onartzea.
- 4) Hurrengo urteko kontabilitate plana eta azalpen txostena onartzea.
- 5) Komenigarriak diren barne arauak onartzea.
- 6) Estatutu hauen 21. artikuluan aurreikusitako Batzorde Iraunkorreko kideak izendatzea eta kargutik kentzea.
- 7) Estatutu hauen 20. artikuluan aurreikusitako batzorde eskuordeak sortzea, kideak izendatzea eta haien eskumenak zehaztea, eta hurrengo artikuluan xedatutakoaren arabera ahalordetze orokorrak edo bereziak ematea.
- 8) Oro har, zuzendari, exekutibo eta aholkulari karguak izendatzea eta kargu gabetzea, eta Fundazioaren gainerako langile teknikoak, administratiboak, lan kontratupekoak eta mendekoak kontratatzea.
- 9) Fundazioaren xedeak behar bezala betetzeko beharrezkoak diren egintza eta kontratu mota oro sinatzea eta onartzea, izaera zibilekoak nahiz merkataritza, lan, administrazio edo bestelako alorrekoak izan.
- 10) Goragoko erabakia beharrezkoa den gaietan, dagozkien erakunde eskudunei proposamenak egitea.
- 11) Lankidetzak tekniko eta langile kualifikatuen prestakuntzako programetan enpresen, entitateen, erakundeen edo partikularren partaidetza sustatzea, fondoak jarritz eta lankidetzak hitzarmenak sinatuz.
- 12) Fundazioarentzat komenigarritzat jotzen denean herentziak, lagapenak edo dohaintzak onartzea edo ukatzea, Babesletza jakinaren gainean jarritz.
- 13) Fundazio estatutuak aldatzea, fundatzaileen borondatea hobeto betetzeko beharrezkoa izanez gero.
- 14) Halaber, legeak edo estatutu hauek Patronatuari esleitzen dizkion bestelako eskumenak edo zereginak.

20. artikulua.- Eskuordetzeak, ahalordetzeak eta batzorde eskuordeak

Patronatuak bere kideetako baten edo batzuen esku utzi ahal izango ditu bere ahalmen batzuk. Ezingo dira eskuordetu inolaz ere, honako gau hauei buruzko erabakiak.

- a) Urteko kontuen onespena.
- b) Jarduera-planaren onespena.
- c) Estatutuen aldaketa.
- d) Fundazioaren bat-egitea, bereizketa, eraldaketa, azkentzea eta likidazioa.
- e) Beste pertsona juridiko bat eratzeko egintzak, non eta egintza horiek helburuei zuzenean lotuta ez dauden.
- f) Beste pertsona juridiko batzuetako partaidetzak eskuratzeko edo saltzeko egintzak, baldin eta partaidetza horien zenbatekoa fundazioaren aktiboaren % 20 baino gehiago bada.
- g) Fundazioaren aktiboaren % 20 gainditzen duten ondasun edo eskubideak xedatzeko edozein egintza.
- h) Zuzkidura handitzea edo txikitzea.
- i) Aktibo eta pasibo guztien edo batzuen bat-egite, bereizketa edo lagapen orokorra.
- j) Sozietateak edo beste pertsona juridiko batzuk azkentzeko egintzak.
- k) Patronatuko kideen autokontratazioa, salbu eta jarduketa hori errepikatua bada eta babesletzak aurretik baimendu badu kasu berdinetarako.
- l) Erantzukizunpeko adierazpenak onartzea eta formalizatzea.

Aurreko paragrafoan adierazitako mugapenen barruan, Patronatuak batzorde eskuordeak eta betearazleak eratu ahal izango ditu kasu bakoitzean zehaztuko diren eskumenekin eta izenarekin; era berean, zeregin mankomunatuak edo solidarioak dituzten ahalorde orokorrak edo bereziak izendatu ahal izango ditu.

Eskuordetze eta ahalordetze orokorrak, auzietarako izan ezik, eta horien balio gabetzeak Fundazioen Erregistroan inskribatu beharko dira.

21. artikulua.- Kontseilu Betearazle Iraunkorra

Batzordeak sortzea eragotzi gabe, Patronatuak gutxienez hiru kide eta gehienez bost izango dituen kontseilu betearazle iraunkor bat sortu ahal izango du eta bertako kide izango dira, nahitaez, Patronatuko lehendakaria edo lehendakariordea, idazkaria eta, egonez gero, diruzaina.

Kontseilu hori, gutxienez, hiru hilean behin elkartuko da eta, Patronatuaren eskuordeaz, Fundazioaren jarduera arrunta fiskalizatu eta kontrolatuko du, eta Patronatuak berariaz esleitzen dizkion bestelako zereginak egingo ditu. Kontseilu betearazle iraunkorak Patronatuaren osoko bilkuretarako deia egin ahal izango du egoki irizten dion guztietan, kontseilarien gehiengo soilak hartutako erabakiaren bidez.

22. artikulua.- Patronatuaren betebeharrak

Fundazioaren Patronatuko kideek ondorengo betebeharrak dituzte:

- a) Fundazioko xedeak zorrotz bete eta betearaztea, Legean eta Fundazioaren estatutuetan xedatutakoaren arabera.
- b) Fundazioaren ondarea osatzen duten ondasunak eta eskubideak administratzea eta horien produktibitatea bete-betean mantentzea, kudeatzaile on baten irizpide ekonomiko-finantzarioak kontuan hartuta.
- c) Legezko ordezkari bati dagokion arretaz betetzea bere kargua.

23. artikulua.- Auto-kontratazio debekua

Patronatuko kideek edo haien ordezkariak Fundazioarekin ezin izango dute kontraturik egin, ez beren izenean ez hirugarren baten izenean, baldin eta Babesletzak horretarako baimena ematen ez badu behintzat, ezarritako prozedurari jarraituz.

Fundazioaren helburuak ahalik eta hobekien lortzeko egingo dira kontratu horiek, interes gatazkarik sortu gabe eta merkatuko baldintzetan, Fundazioan kontratazioaren ardura duen pertsonak edo organoak aldeztatik erabaki arazoitua emanda, betiere.

24. artikulua.- Erantzukizuna

- 1) Patronatuko kideak erantzuleak dira Fundazioaren aurrean legeek zehaztutako moduan.

2) Erantzukizunetik salbuetsita geldituko dira erabakiaren kontra bozkatu dutenak, erabakia hartzen eta betearazten parte hartu ez, eta erabakiaren berririk ez zutela frogatzen dutenak; bai eta, erabakiaren berri izan arren, kaltea ekiditeko komeni zen guztia egin zutela edo, gutxienez, esanbidez aurka agertu zirela frogatzen dutenak ere.

3) Euskal Autonomia Erkidegoko Fundazioen Erregistroan inskribatuko dira jurisdikzio arruntaren aurrean gobernu organoei erantzukizuna eskatzeko egintza eta horren gaineko epai irmoa.

4) Babesletzak, bere ekimenez edo interes legitimoa duenak eskatuta, erantzukizuneko ekintza hori gauzatu ahal izango du. Fundatzaileek ere gauzatu ahal izango dute erantzukizun hori Patronatuko kideen jarduera fundazio helburuen kontrakoa edo haien kalterako denean.

2. kapitulua. Patronatuaren funtzionamendu arauak

25. artikulua.- Barne funtzionamendua

Patronatuak urteko ohiko bi (2) bilera egingo ditu gutxienez. Urteko lehenengo sei hilabetekoaren barruan nahitaez elkartuko da aurreko urteko aurrekontuaren likidazioa, inbentarioa, aurreko ekitaldiko jardueren memoria eta egoeraren balantzea, eta emaitzen kontua onartzeko, estatutu hauetako 32. artikuluan aurreikusitako eran. Era berean, urteko laugarren hiruhilekoan, dagokion deialdia egin ondore, urteko kontua onartuko da abenduaren 31 aurretik Babesletzari igortzeko.

Patronatuaren deialdiak idatziz egingo dira bilera eguna baino 10 egun lehenago gutxienez, larrialdiko kasuetan izan ezik, halakoetan epea 3 egunekoa izan baitaiteke. Deialdiarekin batera, gobernu organoko kideen iradokizunak kontuan hartuta lehendakariak erabakitako gai zerrenda erantsi beharko da.

Halaber, Kontseilu Iraunkorrak Patronatuaren bilera deialdia egin ahal izango du estatutu hauetako 21. artikuluan zehaztutako eran.

26. artikulua.- Eraketa eta erabakiak hartzea

Patronatua behar bezala eratuta geldituko da lehenengo deialdian kideen erdiak gehi bat (pertsonalki nahiz ordezkari bidez) bertaratzen direnean. Patronaturako ordezkari eta botoa eskuordetzen badira, betiere, Patronatuko beste kide bati eskuordetuko zaizkio.

Aurreko paragrafoan adierazitako quoruma lortzen ez bada, Patronatua ordubete beranduago elkartuko da, eta bigarren bilera horretan nahikoa izango da hiru (3) kide gutxienez bertaratzea, baldin eta lehendakaria edo lehendakariordea horien artean badaude.

Aurreko paragrafoetan adierazitakoa alde batera utzita, Patronatuaren bilera deia eginda eta Patronatua behar bezala eratuta dagoela ulertuko da kide guztiak bertaratzen direnean eta bilera egitea aho-batez onartzen dutenean.

Erabakiak botoen gehiengo soilaz onartuko dira, ondorengo kasuetan izan ezik:

1) Bertaratutako bi herenen aldeko botoa beharko duen aldaketa, bat-egite, bereizketa eta azkentze akordioa.

2) Estatutu hauetan bozketa quorum diferentea ezarria duen beste edozein.

Lehendakariaren botoak gerta daitezkeen berdinketak hausteko balioko du.

Idazkariak Patronatuaren bilera bakoitzaren akta egingo du, eta bilera data eta eguna zehazteaz gain, bertaratutako kideak, eztabaida gaiak eta hartutako akordioen edukia jaso beharko ditu.

Ezarri ahal izango da, organoak bideokonferentzia bidez edo komunikaziorako beste baliabide batzuen bitartez bildu ahal izatea, betiere bermatzen bada bileran zeinek parte hartzen duten identifikatzea, komunikazioa jarraitua izango dela, eztabaidetan parte hartu ahal izango dutela eta botoa eman ahal izango dutela. Edonola ere, bilera lehendakaria dagoen lekuan egin dela ulertzen da.

Salbuespen gisa, bilerarik egin gabe ere hartu ahal izango ditu erabakiak patronatuak, betiere informazio - eta boto- eskubideak bermatuta badaude, botoa jaso dela nonbait agerrarazten bada eta haren autentikotasuna bermatzen bada. Erabakia pertsona juridikoaren helbidean eta eman diren baliozko botoetatik azkena jasotako datan hartu dela ulertuko da.

III. TITULUA ONDAREA ETA ERREGIMEN EKONOMIKOA

1. kapitulua. Osaketa, administrazioa eta zaintza

27. artikulua.- Fundazioaren ondarea

Fundazioaren ondarea ekonomikoki balora daitekeen ondasun, eskubide eta betebeharrekin osatuko dute. Fundazioak, eratu ondoren eskuratzen dituenak ere ondare horretan sartuko dira zuzkidurari, atxiki ala ez.

Ondare hori erabili eta administratzerakoan Fundazioak aplikagarri diren arauak beteko ditu, eta lortzen dituen emaitzak edo irabaziak bere xedeetarako erabiliko ditu, estatutu hauetan xedatutakoaren arabera.

28. artikulua.- Baliabideak

Fundazioaren ondarea honako hauek osatzen dute:

- a) Fundazioko eskrituran jasotako hasierako zuzkidura.
- b) Fundatzaileen, entitate babesleen eta entitate laguntzaileen ohiko eta aparteko ekarpenak eta kuotak, eta Patronatuko kideek bere borondatez onartzen dituzten ohiko eta aparteko kuotak eta ekarpenak.
- c) Zuzenbidean onartutako bitartekoez eta, bereziki, beste pertsona, organismo eta erakunde batzuek egindako lagapen, dohaintza, ekarpen eta subentzioen ondorioz, aurrerantzean eskura dezakeen beste edozein ondasun edo eskubide. Dohaintzak, lagapenak eta herentziak onartzen direnean Babesletzari jakinarazi behar zaio.
- d) Fundazioaren ondareak eta gauzatzen dituen jarduerak ematen dituzten emaitzak edo irabaziak, produktuak edo mozkinak, eta indarrean dagoen legediaren arabera eskaini ditzakeen zerbitzuen ordainak.
- e) Aplikagarri den legediaren barruan dagoen beste edozein baliabide.

29. artikulua.- Ondarearen aldaketak

Fundazioaren Patronatuak, une oro eta egoera ekonomikoak gomendatzen duenaren arabera beharrezko gertatzen den guztietan, Fundazioaren kapitalean beharrezko irizten dituen aldaketak, eraldaketak edo bihurketak egin ahal izango ditu kapital horrek, bere balio izendatuari eutsi arren, balio eraginkorra edo eros-ahalmena gal ez dezan.

30. artikulua.- Fundazioaren ondarea zaintzea

Fundazioaren ondarea zaindu eta babesteko ondorengo arauak beteko dira:

- a) Fundazioaren ondarea osatzen duten ondasunak eta eskubideak Fundazioaren izenean egongo dira, bere inbentarioan agertuko dira eta, beharrezkoa denean, dagozkien erregistroetan inskribatuko dira.
- b) Ondasun higiezinak eta/edo eskubide errealak Jabetza Erregistroan inskribatuko dira Fundazioaren izenean. Inskribagarriak diren gainerako ondasunak dagozkien erregistroetan inskribatuko dira.
- c) Baloreak eta dirua, jabetza tituluak, gordailu-ordezlagiriak eta Fundazioaren titularitateko jabari, edukitza, erabilera, gozamen edo bestelako eskubideak egiaztatzen dituzten gainerako agiriak Patronatuak zehaztuko duen entitatean gordailutuko dira Fundazioaren izenean.

d) Gainerako ondasun higigarriak Patronatuak zehaztuko duen eran zainduko dira.

Ondasun eta eskubide horiek guztiak Patronatuko idazkariaren esku dagoen Inbentarioen Liburuan zehaztuko dira eta, hark gainbegiratuta, ondasunak eta eskubideak identifikatzeko eta deskribatzeko beharrezkoak diren inguruabar guztiak jasoko dira.

2. kapitulua. Erregimen ekonomikoa

31. artikulua.- Ekitaldi ekonomikoa

Ekitaldi ekonomikoa urtebetekoa izango da eta urte naturalarekin bat etorriko da. Salbuespen modura, lehenengo ekitaldi ekonomikoa eraketa eskritura sinatzen denetik urte bereko abenduaren 31 bitartekoa izango da.

Fundazioak jarduera plan bat prestatuko du ekitaldi ekonomiko bakoitzeko, eta bertan diru sarrerak eta gastuak jasoko dira modu orekatuan.

Plan hori, azalpen txostenarekin batera, Babesletzari aurkeztuko zaio onartu zen urteko azken hiruhilekoan.

32. artikulua.- Betebehar ekonomikoak eta kontabilitatekoak

Urteko kontuak onetsi eta hurrengo 30 egun naturaleko epearen barruan, Fundazioaren Patronatuak Euskal Autonomia Erkidegoko Fundazioen Erregistroa bidaliko ditu urteko kontuak -behar bezala sinatuta- gordailutzeko. Eta kontu horiek bete egin beharko dituzte irabazi asmorik gabeko entitateei buruzko araudian xedatutako baldintzak.

Fundazioaren urteko kontuetan honakoak sartuko dira gutxienez: balantzea, emaitza kontua, memoria eta aurreko jarduketa planaren likidazioa. Fundazioak izango duen garrantzi ekonomikoa dela eta, urteko kontuei kanpoko ikuskapena egingo zaie. Ikuskatzaileek egindako txostena Euskal Autonomia Erkidegoko Fundazioen Erregistroan inskribatuko da.

Patronatuak Fundazioaren ondare, ekonomia eta finantza egoera jasoko duten inbentarioa, egoeraren balantzea eta emaitzen kontua prestatuko ditu, baita urtean zehar egindako jardueren eta ondarearen kudeaketa ekonomikoaren txostena ere, Fundazioaren helburuak eta lege aginduak bete direla jakinarazteko eta justifikatzeko aski dena. Aurreko urteko diru sarreraren eta gastuen aurrekontuaren likidazioa ere egingo du, horretarako, legeak agintzen duena betez.

33. artikulua.- Kontuak ematea

Urteko lehenengo seihilekoan, Patronatuak, Babesletzaren aurrean zuritu beharko du bere kudeaketa Euskal Herriko Fundazioen 2016ko ekainaren 2ko Legeak dioen xedeetara egokituz.

3. kapitulua. Baliabideak fundazioaren xederako erabiltzeko arauak

34. artikulua.- Diru sarrerren xedea eta administrazio gastuak

- 1) Fundazioaren ondasunak eta irabaziak, zuzenean eta besterik gabe, fundazioaren helburuei atxikiak geldituko dira.
- 2) Fundazioak, aldian-aldian, bere helburuari dagozkion jarduerak programatuko ditu eta, horretarako, urtero prestazioak planifikatuko ditu eta gauzatzeko eta esleitzeko modua erabakiko du.
- 3) Fundazioaren helburuetarako, fundazioaren emaitzen kontuko diru-sarrerren % 70 erabili beharko da gutxienez. Emaitzen kontua kalkulatu da kontzeptu guztiak hartuta, behin kendu ondoren diru-sarrerak lortzeko egindako gastuak, fundazioaren helburuak betetzeari dagozkionak izan ezik.

Fundazioa eratzen denean nahiz gerora ondare zuzkidura kontzeptuan egindako ekarpenak salbuetsita daude baldintza hori betetzetik.

Gainerako diru sarrerek, administrazio gastuak kenduta, Fundazioaren zuzkidura gehituko dute. Administrazio gastuak, gehienez ere, funts propioen % 5 edo urteko ekitaldiko soberakinen % 20 izan daitezke, non eta, lege eta erregelamendu xedapenetan aurreikusitakoaren arabera, Babesletzak, Fundazioaren eskaera arrazoitua jaso ondoren, berariaz besterik baimentzen ez duen.

35. artikulua.- Kontu-ikuskaritza

Fundazioari urtero kanpoko kontu-ikuskaritza bat egingo zaio.

Kontu-ikuskatzaileen txostenean, gutxienez, honako hauek jaso beharko dira:

- a) Kontabilitatearen eta urteko kontuen bitartez egiaztatu izan diren lege araudiaren edo estatutuen balizko arau-hausteei buruzko oharra.
- b) Antzeman dezaketen edozein gertaerari buruzko oharra, gertaera horrek arriskuan jartzen badu Fundazioaren egoera finantzarioa.

Kontu-ikuskatzaileen txostena Fundazioen Erregistroan gorde beharko da, aztertzen dituen kontuekin batera.

IV. TITULUA. ALDAKETA, BAT-EGITEA ETA IRAUNGIPENA.

36. artikulua.- Aldaketa

Fundazioaren Patronatuk estatutuak arrazoiz aldatzea erabaki dezake Fundazioaren helburuak hobeto betetzeko komenigarria baldin bada, eta sortzaileen berariazko debekurik ez badago. Aldatzeko erabakia hartzeko, gutxienez, bertaratutako kideen bi herenen aldeko botoa beharko da.

37. artikulua.- Bat-egitea

Era berean, Patronatuak erabaki dezake beste entitate batekin edo batzuekin bat-egitea, baldin eta fundazioaren helburuari behar bezala erantzuten bazaio. Erabakia arrazoiak azalduta hartuko da eta, gutxienez, bertaratutakoen bi herenen aldeko botoa beharko da.

38.- artikulua.- Bereizketa

Fundazioaren zati bat bereizi ahal izango da edo fundazioa zatitu, beste fundazio bat edo batzuk sortzeko, edo aurretik sortuta dagoen beste fundazio bati edo batzuei eskualdatzeko, ondarea bananduta, baldin eta fundatzaileen horren kontrako borondaterik jasota ez badago, bereizitako fundazioaren helburuak hobeto beteko direla justifikatzen bada eta fundazioaren bideragarritasun ekonomikoa arriskuan jartzen ez bada. Fundazioa bereizteko edo zatitzeko erabakia arrazoituta hartuko da, gutxienez, bertaratutakoen bi herenen aldeko botoa beharko da.

39. artikulua.- Azkentzea

Fundazioa azkenduko da:

- a) Eratu zenean finkatutako helburua erabat betetzen denean.
- b) Fundazioaren helburua betetzea ezinezkoa denean, lege honetan estatutuen aldaketari eta fundazioen bat-egiteari eta bereizketari buruz xedatutakoaren arabera.
- c) Beste batekin bat-egiteak ondorio hori dakarrenean.
- d) Estatutuetan edo eratzeko egintzan ezarritako beste edozein arrazoi gertatzen denean.
- e) Legeek aurreikusitako beste edozein arrazoi gertatzen denean.

40. artikulua.- Iraungitzeko prozedura

Aurreko artikuluko a), b) eta d) puntuetan aurreikusten diren kasuetan, Fundazioa azkentzeko Patronatuaren erabakia eta Babesletzaren berrespena beharrezkoak izango dira.

Nolanahi ere, iraungitzeko erabakia arrazoitu egin beharko da eta ondare egoeraren eta likidazio programaren berri eman beharko da.

Gobernu organoaren erabakirik ez balego edo Babesletzak berretsiko ez balu, Fundazioa iraungitzeko epailearen ebazpen arrazoitua beharko litzateke, Babesletzak nahiz fundazio organoak eskatu ahal izango duena.

Iraungitzeko erabakia edo, dagokion kasuan, epailearen ebazpen arrazoitua Fundazioen Erregistroan inskribatuko da.

41. artikulua.- Likidazioa

Fundazioen likidazioko prozesua patronatuak edo, Babesletzaren kontrolpean, gobernu-organo horrek izendatutako likidazio-batzorde batek eramango du aurrera, salbu eta, kasua hori bada, ebazpen judizial arrazoitu batek besterik ezartzen badu. Fundazioak bere nortasun juridikoa izaten jarraituko du prozesua amaitu arte, eta, epealdi horretan, "likidazioan" dagoen fundazio gisa identifikatu behar da.

Likidazioa egin eta gero geratu diren ondasun eta eskubideak fundatzaileek estatutuetan edota eratzeko aktan aurreikusi zuten hartara bideratuko dira.

V. TITULUA. BABESLETZA ETA FUNDAZIOEN ERREGISTROA

42. artikulua.- Babesletza

Fundazioa Euskal Herriko Fundazioen Babesletzaren tutoretza, aholkularitza eta kontrolpean gelditzen da, Euskal Herriko Fundazioen 2016ko ekainaren 2ko Legeak eta aplikagarria den gainerako legediak aurreikusitako moduan.

43. artikulua.- Fundazioen Erregistroa

Fundazioaren eraketa eta legearen arabera fundazioak behar dituen egintza edo negozio juridiko guztiena Euskal Herriko Fundazioen Erregistroan inskribatuko dira.

VI. TITULUA. FUNDAZIOAREN ERATZAILEEN, BABESLEEN ETA BESTELAKO LAGUNTZAILEEN ARAUBIDEA

44. artikulua.- Eratzaileak

Eratzaileak izango dira fundazio izaerako ekarpen ekonomikoren bat egiten dute eta fundazio eskritura sinatzen duten entitate publikoak edo pribatuak.

45. artikulua.- Entitate babesleak

Entitate babesleak dira Fundazioaren xedeak eta helburuak lortzen eta funtzionamendu gastuak ordaintzen laguntzeko konpromisoa hartzen dutenak, urteko kuota adierazgarria eta iraunkorra ordainduz.

Fundazioaren Patronatuari dagokio entitate babesleen izaera aitortzea eta, gertatzen denean, babesle izaeraren galera adieraztea.

46. artikulua.- Entitate laguntzaileak

Entitate laguntzaileak dira fundazioaren helburua lortzen lagun dezaketen jarduerak edo ekarpenak egiten dituzten pertsona fisikoak edo juridikoak.

Entitate laguntzaile gisa atxikitzeko eskaerak Patronatuak onartu beharko ditu eta berak zehaztuko ditu laguntzaile horiei dagozkien eskubideak eta atribuzioak.

47. artikulua.- Ohorezko patronoak

Patronatuak Fundazioaren ohorezko patrono izenda ditzake fundazioaren helburua lortzeko ekarpen nabarmena egin duten edo egin dezaketen pertsona fisikoak edo juridikoak. Patronatuak ohorezko patronoen eskumenak eta atribuzioak onartuko ditu izendapeneko erabakian.

48.- artikulua.- Zigor erregimena.

Euskal Autonomia Erkidegoko Fundazioen Legean aurreikusitako zigor araubideari lotua dago Fundazioa.